

Resultat sensaziunal per la grupp da Sent

Tir da gruppas naziunal

DA GION NUTEGN STGIER / ANR

■ **Da sis gruppas grischunas che han sajettà la segunda runda naziunala en il champ A han be duas cuntanschi la terza e davosa runda svizra. En il champ D, quel cun l'arma militar, han nov gruppas tratg la segunda runda e da quellas èn alura tschintg sa qualifitgadas per la terza runda naziunala.** La concorrenza svizra tar il tir da gruppas va plaunet en la fasa finala. La davosa fin d'emna è vegnida sajettada la segunda runda naziunala. Ussa proximamain stat sin il program anc la terza e davosa prerunda svizra e lura il grond final a Turitg en dus mais. En il champ A, quel cun l'arma da standard, avevan dad 11 gruppas anc sis gruppas da noss chantun cuntanschi la segunda prerunda. Cun l'arma da militar, la categoria D, avevan da 17 gruppas grischunas fatg nov il sigl en la segunda runda svizra. Sin champ naziunal cumbattan mintgamai tschintg gruppas e da quellas fan lura adina duas il sigl en la proxima runda. Per cuntanscher la proxima runda ha ina grupp er dad avair in pau cletg, uschia èsi pussaivel che ina grupp cun in resultat aut sorta da la concorrenza ed ina cun in resultat bass resta anc en la concorrenza, quai tenor constellaziun da la grupp.



La grupp da Castrisch resta en la concorrenza naziunala en il champ D.

FOTO G. N. STGIER

La grupp da Favugn cun cletg

Da las sis gruppas che han cumbattì en il champ A han cun Cuira e Favugn be duas cuntanschi la terza e davosa runda

da svizra. Omaduas gruppas han betg sajettà uschè ferm cun 966 puncts e 953 puncts. Cunzunt Favugn ha segir

gì cletg da sa qualifitgar per la terza runda cun avair fatg be 953 puncts. Sortidas da la concorrenza èn las duas

gruppas da Haldenstein, Tavau e quella da Ruschein che ha fatg 949 puncts. Ils megliers resultats singuls han tratg

cun 195 puncts *Willi Schnider*, Cuira, *Christian Felix*, Haldenstein e *Michael Cadruvi*, Ruschein. La terza ed ultima runda svizra vegn sajettada la proxima fin d'emna.

Er Castrisch è anc da la partida

Nov gruppas da noss chantun han tratg la segunda runda naziunala cun l'arma da militar. Sajettà sensaziunal ha cuntant la grupp da Sent cun far 705 puncts. Ils tschintg Engiadinais han fatg tants puncts sco la grupp da Heimenschwand-Buchholterberg BE ed èn uschia stads cun ils Bernais la grupp cun il meglier resultat svizzer. Tratg excellent han mintgamai cun 702 puncts er las duas gruppas da Monstein. Ferm han er sajettà ils tschintg tiradurs da la grupp da Castrisch cun far 697 puncts. Sa qualifitgada per la davosa runda naziunala è er cun in pau cletg la grupp da Tavau. Sortidas da la concorrenza èn las duas gruppas da Tumegl e cuntant la grupp II ha bain gì disfortuna cun esser a fin la concorrenza cun 696 puncts. Tumegl II è stà en la grupp da tschintg cun Heimenschwand-Buchholterberg BE che ha fatg 705 puncts e cun Saas-Balen VS che ha tratg 699 puncts. La grupp da Tavau per exempel ha be fatg 681 puncts e quels puncts han tanschi per cuntanscher la proxima runda. Sortidas da la concorrenza èn lura las gruppas da Ruschein e Malix. *Ueli Krebs* da Sent e *Thomas Studer* da Monstein han tratg cun 146 puncts il pli aut resultat singul.